

書

永

編

豈永編下集

記禮者云猩猩能言不離禽獸淮南子云猩猩知往而不  
知來西國胡人取其血染堯剌色鮮不黯或曰若刺  
其血問之爾與我幾許猩猩曰二升果足其數若加  
之鞭撻而問之則隨所加而得焉阮汧云曾使封谿  
見邑人說猩猩在山谷數百為群里人設酒路側又  
織草為屨更相連結人伏伺其旁猩猩見酒及屨則  
知為餌已又知設者祖先姓字遂斥罵其人且相戒  
曰毋墮奴輩計中含爾而去復相謂曰試共嘗之既

而染指知味則冥然忘夙戒相與沾濡不覺遽醉因  
取履着之顛連頓仆乃為人所擒予謂猩猩獸也曾  
何足道人為萬物之靈廼有黷貪好色貪爵戀祿迷  
而不知止者不亦猩猩之類也乎

士豈能長守山林長親蓑笠但居市朝軒冕時要使  
山林蓑笠之念不忘乃為勝耳陶淵明赴鎮軍參軍  
詩曰望雲慙高鳥臨水愧游魚真想初在襟誰謂形  
迹拘似此曾襟豈為外榮所點染哉荆公拜相之日  
題詩壁間曰霜松雪竹鍾山寺投老歸歟寄此生只

為他見趣高故合則留不合則拂袖便去更無拘絆  
山谷云佩玉而心若槁木立朝而意在東山亦此意  
也

鷗峯子曰昔者白龜能見夢于宋元君而不能避命  
且之網能知士十二鑽而不能避剗腸之患烏鰂每  
遇漁舟即吐墨染水令黑以混其身漁人見黑即知  
網之大獲余於是知夫小智不足以保身而深謀適  
足以召禍有為白龜烏鰂之所為而卒不蹈白龜烏  
鰂之所蹈者幾希

王公曰與楊文公億為空門友楊公調汝州公適當  
軸每音問不及他事唯談論真諦而已余嘗見楊公  
親筆與公云山栗一稱聊表村信蓋汝唯產栗而億  
與王公忘形以一秤栗遺之斯亦昔人鷄黍縞紵之  
意也

馮瀛王詩雖淺近而多諳理若但知行好事莫要問前  
程須知海岳歸明主未省乾坤陷吉人之類世雖盛  
傳而罕見其全篇今並錄之詩曰窮達皆由命何勞  
發嘆聲但知行好事莫要問前程冬去水須泮春來

草自生請君觀此理天道甚分明不偶作云莫爲危  
持便愴神前程往往有期因須知海岳歸明主未省  
乾坤陷古人道德幾時留去世舟車何處不通津但  
教方寸無諸惡狼虎叢中也立身

東陽陳同父資高學奇跌宕不羈常與客立言有一  
士鄰于富家貧而屢空每羨其鄰之樂旦日衣冠謁  
而請焉富翁告之曰致富不易也子歸齋三日而後  
予告子以其故如言復謁乃命待于屏間設高几納  
師資之贄揖而進之曰大凡致富之道當先去其五

賊五賊不除富不可致請問其目曰即世之所謂仁義禮智信是也士盧胡而退同父每言及此輒掀髯曰吾儒不為五賊所制當成何等人邪

張賢良君悅咸家蜀綿州世以積德聞紹聖初再試制科宰相章惇覽其策以所對不以元祐為非大怒雖得簽書劔西判官以去而科目自是廢矣仕既不甚達益篤意植媿廼慶以遺後人嘗一日晝寢夢神人自天降告之曰天命爾子名德作宰相驚而寤未幾而魏公生時魏公之兄已名滉君悅不欲更所從

乃字魏公曰德遠出入將相垂四十年忠義勲名為  
中興第一天固有以啟之者歟

支公好鶴住剡東岵山有人遺其雙鶴少時翅長欲  
飛支意惜之乃鎔其翮鶴軒翥不復能飛乃反顧翅  
垂頭視之如有懊喪意支曰既有凌霄之姿何肯為  
人作耳目之翫養令翮成置使飛去

開元中頒賜邊軍纈衣製於宮中有兵士於短袍中  
得詩曰沙場征戍客寒苦若為眠戰袍經手作知落  
阿誰邊意多添線含情更着綿今生已過也重結



後身緣兵士以詩白於帥帥進之玄宗命以詩遍示  
六宮曰有作者勿隱吾不罪汝有一宮人自言萬死  
玄宗深憫之遂以嫁得詩人仍謂之曰我與汝結今  
身緣邊人皆感泣

光祿卿王守和未嘗與人有爭嘗於案几間大書忍  
字至於帟幌之屬以繡畫為之明皇知其姓字非時  
引對問曰卿名守和已知不爭好書忍字尤見用心  
奏曰臣聞堅而必斷剛則必折萬事之中忍字為上  
帝曰善賜帛以旌之

子孟陽初為戶部侍郎夫人憂惕謂曰以爾人材而在丞郎之位吾懼禍之必至也戶部解喻再三乃曰不然試會爾同列吾觀之因過招深熟者客至夫人垂簾視之既罷會喜曰皆爾之儔也不足憂矣未座黥綵少年何人也答曰補闕杜黃裳夫人曰此人全別必是有名卿相

錢穆內相本以文翰風流著稱而尹京為近時第一余嘗見其剖決甚閑暇雜以談笑諠譁而胥吏每一顧問皆股慄不能對一日因決一大滯獄內外稱之

會朝處蘇長公舉之曰所謂霹靂手也錢曰安能霹靂手僅免葫蘆蹄也

狄仁傑之為相也有盧氏堂姨居子午橋南別墅姨止有一子而未嘗來都城親戚家梁公每遇伏臘晦朔脩理甚謹嘗經甚雪多休暇因候盧姨安否適見表弟挾弓矢携雉兔來歸膳味進於北堂顧揖梁公意甚輕簡公因啟姨曰某今為相表弟有何樂從願悉力以從其旨姨曰相自貴爾有一子不欲令其事公主公大慙而退

魏知古起諸吏為姚崇引用及同升也崇頗輕之無  
何請知古攝吏部尚書知東都選士事以吏部尚書  
宋璟門下過官知古心銜之思有以中之者時宗二  
子並分曹洛邑會知古至恃其家君頗招顧請託知  
古歸悉以上聞他日上召崇從容謂曰卿子才乎皆  
何官也又安在崇揣知上意因奏云臣有二子兩人  
皆分司東都矣其為人欲而寡慎是必以事干知古  
然臣未及問之上始以丞相子重言之欲微動崇而  
意崇私其子或為之隱及聞崇所奏大喜且曰卿安

從知之崇曰知古微時是臣之所慰薦以至榮達臣之子愚謂知古見德必容其非故必干之上於是明崇不私其子之過而薄知古之肩崇也上欲斥之崇為之請曰臣有子無狀撓陛下法陛下特原之臣為幸大矣而由臣逐知古海內臣庶必以陛下為私臣矣非所以裨元化也上久乃許之翌日以知古為工部尚書罷知政事

太宗謂尉遲公曰朕將嫁女與卿稱意不敬德謝曰臣婦雖鄙陋亦不失夫妻情臣每聞古人語富不易

妻仁也臣竊慕之願得聖恩叩頭固讓帝嘉之而止  
將軍王果曾經峽口見一棺於崖側將墜使人遷之  
平邊得銘云更後三百年木漂我臨長江欲墮不墮  
逢王果

竺篴引朝鮮津卒霍里子高妻麗玉所作也子高晨起  
刺舡而擢有一白首狂夫被髮提壺亂流而渡其妻  
隨呼止之不及遂墮河水死於是按竺篴而鼓之作  
公無渡河之歌聲甚悽愴曲終自投河而死霍里子  
高還以其聲謠妻麗玉玉傷之乃引竺篴而寫其聲

聞者莫不墮淚飲泣焉麗王以其聲傳鄰女麗容名  
曰琴瑟引焉

陌上桑出秦氏女子秦氏即邨人有女名羅敷為邑  
人千乘王仁妻王仁後為越王家令羅敷出採桑於  
陌上趙王登臺見而悅之因飲酒欲奪焉羅敷乃彈  
箏乃作陌上歌以自明焉

梅屋許先生曰耕堯田者有水廬耕湯田者有旱憂  
耕心田者無慮無憂日日豐年

楚師伐宋師人多寒楚子拊而勉之三軍之士皆如

挾纊楚子不能使人皆挾纊而三軍為之煖煖其言也楚人有饋鼈醪者楚莊王授之於河令將士迎流而飲之三軍皆醉楚莊王不能使河為醪而三軍為之辭醉其賜也然則虛言詭賜亦足以感士也士非虛詭所能感也楚子興心於此蓋有不費而惠者矣宋謝晦為荊州都督甚以年少自矜或問其年答曰三十五或笑曰昔荀中郎年二十七為北府都督卿比之已為老矣晦頓顙慙色晦之慙生於自矜年少何足矜正如人言亦何足慙士夫得位顧功德何如少



老非所計必以年少官尊為勝祇生其躁進之心有所謂為爾寂寂鄧禹笑人者將無所不至矣始晦為宋臺若衛還都迎家賓客輻輳兄瞻驚駭謂晦曰吾家素以靜退為業汝勢傾朝野豈門戶福邪乃離隔戶庭曰吾不忍見此又言於高祖曰臣本素士祖父位不過二千石弟年三十志用凡近榮冠臺府位任顯密福過災生其應無遠特乞降黜以保衰門高祖不聽晦遂建佐命功寄任益重瞻憂懼成疾不治而卒晦不警於其兄之言而慚於他人之問持此心志

馴至誅滅不亦宜乎

詩曰它山之石可以攻玉孔子曰三人同行必有我師又曰明鏡所以見形往古所以知今賈誼曰不習為吏視已成事今已事可知也前車覆後車誠今轍迹可見而不避是後車又將覆也京房曰後世之視今猶今之視古也杜牧之曰人不暇自哀而後人哀之後人哀之而不鑒之是使後人而復哀後人也嗚呼戒之哉

魯男子不納嫠婦謂柳下惠嫗不逮門之女則可在

吾則不可吾將以吾之不可學惠之可而孔子稱其  
為善學惠者善其能自審也朱晦菴嘗誨門人言今學  
者之病如學孔子便學微服過宋君命召不俟駕見  
南子與佛肸召欲往之類有多少處不學却只學此  
此是其不知魯男子之不可矣

胡宿少與一僧善僧有祕術能化瓦石為黃金且死  
將以授宿使葬之宿曰後事當進力他非所與僧嘆  
曰子之志未可量也楊楷為漢州軍事判官道遇術  
士曰君知有化瓦石為黃金者乎就楷試之既驗欲

授以方楷曰吾從吏祿安事化金哉術士曰子志若此非吾所及也竇舜卿監平鄉縣酒稅有僧欲授以化汞為白金術謝曰吾祿足養親不願學也是三人者皆能不為此也

李西涯程篁墩少小時俱以神童被薦英廟親試之對句曰螭螭一身鱗甲程即應聲曰鳳凰遍體文章上加稱賞時李尚伏地徐對曰蜘蛛滿腹經綸上遂大異之曰是兒他日作宰相耶俱賜寶鑑而出后李出入館閣四十年卒如聖語

錢與謙初會試京師謁西涯學士時有以司馬溫公像求涯翁贊者翁遂命與謙代作其中有拔茅連茹公之在朝青苗變法公之在野公之再起是為元祐公之亡是為靖康等語翁太加稱賞以為數語該括宋家治亂殆盡為之延譽于謝方石諸公謂有倫魁之才已而禮闈廷對果占首選

太祖初有天下一夕微行至神樂觀見一道士於燈下結網巾問曰此何物耶對曰此網巾也用以裹之頭上萬髮髻有齊矣明日召為道官且命取為定制

明天淵髯長數尺仕元為學士元亡削髮為僧改名  
來復見心而其髯如故太祖既有天下召至恠而問  
之曰汝不欲仕我而出家為僧吾亦任汝然留髯亦  
有說乎對曰削髮除煩惱留鬚表丈夫上笑而遣之  
南京歷代帝皇廟每年一祀帝皇之前皆一爵惟獻  
漢高祖以三爵蓋因廟初成時

太祖臨祭禮畢復至高祖神位前笑謂曰劉君今日  
廟中諸君當時皆有所憑藉以得天下惟朕與汝不  
階凡土手提三尺致位天子比諸君尤為難事可共

多飲二爵至今遂為定制

太祖有天下建廟以祀歷代之帝王自伏羲以下像皆易成至元世祖其面乃屢為淚痕所汙塑工頻加脩飾然越宿如故

太祖聞之幸廟謂曰痴達子汝以胡人入主中國傳祚幾至百年可謂幸矣今我以天命人歸奄有天下然於汝之子孫亦不加戮但驅還漠北而已則我之待勝國亦可謂恩有禮矣汝復何恨耶宜自寬釋毋再啼哭為也於是塑工明日遂奏世祖面上無淚矣

國初時京都中有沈萬三甚富今會同館是其故宅  
後湖中地是其花園京城自洪武門至水西門是其  
所築也

南京國學之址舊為積屍之所謂之萬人坑每天陰  
雨濕行人多為鬼眩有至死者因建鷄鳴寺設醮以  
度而鬼又夜飛磚擊瓦僧人怖恐

馬太后聞而啟于

太祖曰此非孔子大聖無以鎮之是日遷大成木主  
于此鬼遂不復為祟後因建學焉



洪武初制天下官員三年一朝覲而九州縣之老人亦與焉某年朝覲

太祖問一老人曰朕將命工部築室於後湖之中以爲藏天下黃冊之所然當作何向宜乎一老人對曰此堂當東西相向庶朝夕皆爲日色所曬而黃冊無沍爛之虞也

太祖既喜此老人之對又見其貌頗類猫既明日遂召至謂之曰汝爲朕定冊室之向甚喜朕今復將託汝爲守此冊無俾爲鼠耗遂命一內侍引至後湖埋

之自是後湖雖有鼠而黃冊無恙弘治某年戶部郎  
中東莞鄧深嘗管冊後湖一日獨坐于廳事中見一  
老人入揖而言曰吾為朝廷守此黃冊今將百四十  
年一冊不為群鼠所噬然未嘗或蒙管冊諸公隻鷄  
斗酒之賜恐此非所以待有功者言訖忽不見鄧明  
日即具牲醪祀之至嗣管冊者歲必祀之以為常或  
曰老人廣之新會人也

方孝孺先生未生時其父將葬其祖已預擇某日矣  
忽夜夢一朱衣人前跪曰聞執事明日要作尊翁先

生大人之藏於某山之原然吾九族居此已數百年  
子孫繁衍不知其數望執事再緩三日吾當從而避  
之願以仁恕為心俯從所請言訖辭去明日起土即  
得一穴闊六丈許中有赤蛇千餘尾共一穴其一長  
數丈蓋所夢之赤衣也先生之父素不信鬼神事見  
蛇不顧亦不憶夢中之言積薪縱火焚之有煙一道  
直指先生之家是時母方妊後數日先生生焉厥狀  
甚異舌能銍入鼻中幼穎悟甚長師宋景濂為文護  
論滂沛類蘇東坡官至學士盡忠於建文君遭赤九

族蓋蛇之報云

太祖開宴賞月而月為濃雲所掩因命解學士縉賦詩解作風落梅一闕其辭曰嫦娥面今夜圓下雲簾不著臣見拚今宵倚闌不去眠看誰過廣寒殿

上覽之懽甚留縉飲至東方白

張士誠據吳中東南名士多往依之不可致者惟楊廉夫一人士誠無以為計一日聞其來吳使人要於路廉夫不得已乃一至賓賢館中時元主方以龍衣御酒賜士誠士誠聞廉夫至甚說即命飲以御酒酒

未半廉夫作詩云江南歲歲烽煙起海上年年御酒  
來如此烽煙如此酒老夫懷抱幾時開士誠得詩知  
廉夫不可屈不強留也

朱陳村在徐州豐縣東南一百里深山中民俗淳質  
一村惟朱陳二姓世為婚姻白樂天有朱陳村詩三  
十四韻其畧云縣遠官事少土深民俗淳有財不行  
商有丁不入軍家家守村業頭白不出門生為陳村  
人死為陳村塵田中老與幼相見何欣欣一村惟兩  
姓世世為婚姻親屬居有族少長遊有群黃鷄與白

酒歡會不隔旬生者不遠別嫁娶先近鄰死者不遠  
葬墳墓多統村既安生與死不苦形與神所以多壽  
考往往見玄孫予每誦之則塵襟為之一灑恨不生  
長其地後讀坡翁朱陳村嫁娶圖詩云我是朱家舊  
使君勸農曾入杏花村而今風雨那堪盡縣吏催錢  
夜打門則宋之朱陳已非唐時之舊若以今視之又  
不知其何如也

正統間宮殿當綵繪計用牛膠萬餘觔遣官齋勅屬  
巡撫南直隸尚書周公恂如數辦供時公以議事赴

京遇諸途勅使請公還治公曰第行自有處置至京  
言京庫所貯皮張歲久朽腐請出煎膠應用回治即  
撥餘米買皮照數輸納以新易舊兩得便利太監王  
振欣然從之益加敬重

正統中都御史陳智性剛而躁嘗坐堂偶有蠅拂其  
面即怒叱從者拿從者紛然東奔西突為逐捕之狀  
少頃俟其怒解稟問拿何人乃叱之曰是蠅有相知  
者以寬緩為勸即置一木簡書戒暴怒三字於上置  
諸左右以自懲及至有觸忤者輒舉木簡撻之一日

與掌順天府事工部侍郎李膺在朝議事不合相忿  
詬朝廷遂兩罷之

解學士縉應制題虎顧衆彪圖曰虎為百獸尊誰敢  
觸其怒惟有父子情一步一回顧 文皇素不喜

仁宗感此詩甚思時 仁宗留守南京頗懷憂因命  
所親信者莫如夏原吉即日往迎之可謂得諷體矣  
楊文定公溥執政時其子自鄉來云道出江陵獨不  
為縣令所禮乃天台范公理也文定深重之即擢為  
德安知府再擢貴州左布政使或勸當致書范公曰



宰相為朝廷用人非私于理也聞文定卒乃祭而哭之以謝知己

于肅愍公謙為兵部尚書當己巳之變議者請燒通州倉以絕虜望公曰國之命脉民之膏脂顧不惜邪傳示城中有力者恣取之數日粟盡入城矣

王文端公直在吏部時其子為南京國學博士考績在部文選郎中欲留侍公改北學公不可曰是亂法自我始矣

都御史韓公雍征大藤峽出兵令五鼓戰將領者聞

賊已覺恐遲失事二更即發大破之公賞其功而問以違令之罪以軍法當斬乃具聞請釋曰萬一不用命而敗柰何人謂公得將將之體

公與夏公墳飲各出酒令公飲一字內有大人小人復以諺語二句証之曰傘字有五人下列衆小人上侍一大人所謂有福之人人服事無福之人服事人夏云爽字有五人旁列衆小人中藏一大人所謂人前莫說人長短始信人中更有人

章公懋為南京國子祭酒有監生請假託說一力採

薪不至將往求之公聞之愕然曰薪水之資託有失  
奈何憂動顏色使亟求且冀得之當復我此生甚悔  
曰公待我以誠奈何詒之明日返命其實謝罪

世傳呂洞賓唐進士也詣京師應舉遇鍾離公于岳  
陽授以仙訣遂不復之京師今岳陽飛吟亭是其處  
也近時有題絕句于亭上云覓官千里赴神京鍾老  
相傳蓋便傾未必無心唐事業金丹一粒誤先生余  
酷愛其旨趣蓋夫子告沮溺之意也

宋淳熙中王季海為相奏起汪玉山為大宗伯知貢

舉且以書趣來玉山將就道有一布衣之友平生極  
相得屢黜於禮部心甚念之乃以書約其胥會于富  
陽一蕭寺與之對榻夜分密語之曰某此行或者典  
貢舉當特相牢籠省試程文易義胥子中可用三古  
字以此為驗其人感喜玉山既知舉搜易卷中果有  
胥子內用三古字者遂徑批上置之前列及拆號乃  
非其友人也私竊恠之數日友人來見玉山怒責之  
曰此必足下輕名重利售之他人何相負乃如此友  
人指天誓曰曰某以暴疾幾死不能就試何敢漏泄於

他人王山終不釋然未幾以古字得者來謁王山因問之曰老兄頭場冒子中用三古字何也其人泯默久之對曰茲事甚怪先生既問不敢不以實對某之來就試也假宿于富陽某寺中與寺僧閑步廡下見室下一棺塵埃漫漶僧曰此一官貞女也殯于此十年矣杳無骨肉來問又不敢自葬之因相與默然是夕夢一女子行廡下謂某曰官人赴省試妾有一語相告此去頭場冒子中可用三古字必登高科但幸勿相忘使妾朽骨早得入土既覺甚怪之遂用其言

果明前列近已往寺中葬其女矣土山驚嘆此事焉  
北山可久為余言雖近於語怪然亦不可不傳足以  
祛人二蔽一則功名富貴信有定分有則鬼神相之  
無則雖典貢舉者欲相牢籠至於場屋亦不能入此  
豈人之智巧所能為乎一則人發一念出一言雖昏  
夜暗室人所不知而鬼神已知之矣彼欲自欺於冥  
冥之中而曰莫予云覲者又惑之甚者也

姚鏞為吉州判官以平寇論功不數年擢守章貢為  
人豪雋喜作詩自號雪蓬嘗令畫工肖其像騎牛於

澗谷之間索郡人趙東野題詩東野題云騎牛無笠  
又無簑斷隴橫岡到處過暖日暄風不常有前村雨  
暗却如何蓋規切之也君無何忤帥臣以貪劾之時  
端平更化之初特重施行貶衡陽人皆服東野之先  
見

漢翟公為廷尉既罷門可設雀羅乃書門曰一貴一  
賤交情乃見唐李適之罷相作詩曰避賢初罷相樂  
聖且銜杯為問門前客今朝幾箇來蓋笑而附寒而  
棄從古已然漉夫一負竇嬰於擯棄之時任安不負

衛青於衰落之日徐晦越鄉而別臨賀后出境而置東坡宜其足以響千載之盛頌也

宋紹興中劉光世在淮西軍無紀律張魏公為都督奏罷之命叅謀呂祉往廬州節制光世頗得軍心祉儒者不知變繩束頗嚴諸君忿怨統制劉瓊率衆縛祉渡淮歸劉豫魏公方宴僚佐報忽至滿座失色公色不變徐曰此有說第恐虜覺耳因樂飲至夜分乃為蠟書遣死士持遺瓊言事可成成之不可速全軍以歸虜得書疑瓊分隸其衆困苦之邊賴以安南軒



言符離之役諸軍皆潰唯存帳下十人某終夕彷徨而先公方熟寢鼻息如雷

張無垢在越上作幕官不請供給錢在館中進書不肯轉官人皆以為好名之過無垢曰即請月俸又受供給偶然進書又便受賞於我心實有不安此亦本分事何名之好貪者徃徃不省尋思此心病也心有病人安得知我知之當自醫人既不自知病反惡人醫病猶婦人妬者非特妬其夫又且妬人之夫其惑甚矣無垢此喻甚切世降俗薄貪濁成風互相與非

笑廉者諛佞成風反相與非笑直者軟熟成風反相  
與非笑剛者競進成風反相與非笑恬退者侈靡  
成風反相與非笑儉約者傲誕成風反相與非笑譙  
默者賈子云莫邪為純兮鉛刀為銛東坡云變丹青  
於玉瑩兮乃反謂子為非智風俗至於如此豈不可  
哀

李疆父為昭文相嘗出六和塔題詩云往來塔下幾  
經秋每恨無從到上頭今日登臨方覺險不如歸去  
卧林丘疆父為相清正謹守規矩自奉如寒士書卷

不釋手薨于位謚文清

潁濱釋莊子曰魚不畏網罟而畏鸚鵡畏其天也物之畏其天誠有可恠者余里中一村童嘗見蛙十數聚于汙池叢棘之下欲前捕之熟視乃一巨蛇蟠棘下以次啖群蛙群蛙凝立待啖不敢動又村叟見蜈蚣逐一蛇行甚急蜈蚣漸近蛇不復動張口以待蜈蚣竟入其腹逾時而出蛇已斃矣村叟棄蛇于深山中踰旬往視之小蜈蚣無數食其腐肉蓋蜈蚣產卵于蛇腹中也余又嘗見一蜘蛛逐蜈蚣甚急蜈蚣逃

入籬搶竹中蜘蛛不復入但以足踰竹上搔腹數四而去伺蜈蚣久不出剖竹視之蜘蛛已節節爛斷如懸簪矣蓋蜘蛛搔腹之時乃灑溺以殺之也物之畏其天有如此者夫蛇之噬群蛙自以為莫已敵矣而不知蜈蚣之能涉其腹也蜈蚣之螫蛇育子自以為莫吾禦矣而不知蜘蛛之能醢其軀也世之人昂昂然以凶毒自多者可以觀矣且蛙之不能敵蛇固也蜈蚣小於蛇矣而能制蛇蜘蛛小於蜈蚣矣而能制蜈蚣物豈專以小大為強弱哉

莊子謂涇入水不濡入火不熟如周公遭變而赤烏  
几几孔子厄陳而絃歌自如皆至人也不濡不熟言  
其心耳非言其血肉之身也

秦襄毅公絃巡撫陝西時秦府旗校肆橫民苦之公  
悉擒治不少貸秦王不能堪奏公欺滅 憲皇怒逮  
公下錦衣獄命內臣尚亨籍其家止得黃綃一疋故  
衣數事亨回奏公貧狀上親閱其貲嘉歎良久詔釋  
公繫且賜鈔萬貫以旌其廉調撫河南既抵任巨璫  
汪直亦以事至汪時竊弄威福聲勢烜赫他巡撫官

率屈禮以見公獨與抗禮畧不為屈汪亦知重公不為較公乃密疏汪多帶旗校騷擾地方汪回京

上問各省撫臣賢否汪獨稱公庶能上以公疏示汪汪叩頭伏罪稱公賢不置 上釋之

張荏簡公悅奉職守法以不欺為本在刑部時朝士有囑其所親者曰不敢撓公法但乞假一詞使知某嘗有言耳訖事而聞之曰其人無大罪既據法施之無敢偽言以市恩聞者歎服在浙江始以糊名校士尋去之曰我且自疑人誰信我請托覬覦屹不為動

而士皆帖服無敢干以私者公平居謹畏小心無疾  
言厲色至臨事卓有定見未嘗以恩怨利害動其心  
嘗謂人曰古之聖賢其過人遠甚凡所猷為皆公無  
私故其事業光明俊偉今之人去古聖賢亦遠矣每  
事竭其公忠尤恐不及况復濟之以私乎或言有善  
讀書不善作官者公嘆曰此正不善讀書耳世豈有  
遵書本行而誤者冢宰去位衆望咸屬公或言內未  
有為之地者公直視不答其人懼而退公性素清約  
自小官至重任始終一節歸處杜門任外公私事一

無所預時見風俗奢靡自甚益崇節儉以率子孫嘗  
書揭屏間曰客至留饌儉約適情殺隨有而設酒隨  
量而傾雖新親不搥飯雖大賓不宰牲匪直戒奢侈  
而可久亦將免煩勞以安生

臘月剖脩竹相接各釘以竹丁引泉之其者貯之以  
缸杜甫所謂剖竹走泉源者此也又須愛護用之諺  
云近水惜木此實脩福之事云

諺曰慈不掌兵義不主財君子曰惟慈掌兵惟義主  
財論語曰仁者必有勇非慈何以掌兵易曰理財正



辭禁民為非曰義非義何以主財不慈掌兵賊也不義主財盜也

子奇年十六齊君使治阿既而君悔之遣使追追者友國曰子奇必能治阿共載皆白首也子奇至阿鑄庫兵以作耕器魏曰聞童子治邑庫無兵倉無粟乃起兵擊之阿人父率子兄率弟以私兵戰遂敗魏師昔管仲東縛自魯之齊路飢而泣過綺邑乞食封人號歿之因竊謂仲曰君用齊將何報我仲曰如子之言我且賢之用能之使勞之論我何以報子封人怨

之韓信始為布衣從人寄食飲人多厭之者嘗釣於  
城下諸母漂有一母見信飢飯信竟漂數十日信喜  
謂漂母曰吾必有以重報母母怒曰大丈夫不能自  
食吾哀王孫而進食豈望報乎信後為楚王召所從  
食漂母賜千金夫施人者不求報當如漂母不當如  
封人受人施者不忘報當如韓信不當如管仲仲父  
之言正矣我何以報子心無乃失之忍乎淮陰之言  
陋矣吾必有以重報母情固有所不容已也

天之將明必倏暗而後明火之將滅必霎明而始滅

花果木將死先一年必繁華而盛實其氣始脫惟人事亦有之倏暗者非所慮霎明者不足喜盛之極者衰之兆也

古詩云一日看除目三年損道心予謂人患道心不存耳道心果存豈看除目所能損哉彼慕膾炙餌之念洗滌未淨往往身寄山林而心存朝市跡履泉石而意繫軒冕視山林泉石反若籠檻桎梏宜其看除目而心為之損也特所損者人心耳豈道心哉伊川曰百官萬務金華百萬之衆曲肱飲水樂在其中矣

萬變皆在人其實無一事朱文公云良其智是止於  
止行其庭是止於動不獲其身是無與於已不見其  
人是亦不見人無人無已但見是此道理各止其所也  
止而至於如此其誰能動之昔有僧居深山中山鬼  
百計害之或誘以淫聲炙色或眩以珍羞玩好或懼  
以奇形異物或脅以刀鋸炮烙僧皆不為之動久之  
廼寂然無有或問其故僧曰山鬼之伎倆有盡老僧  
之不聞不見無盡此即所謂不獲其身不見其人也  
心安如是又豈除自所能損哉

真西山論菜云百姓不可一日有此色士大夫不可一日不知此味予謂百姓之有此色正緣士大夫不知此味若自一命以上至於公卿皆得咬菜根之人則當必知其職分之所在矣百姓何愁無飯吃

苗劉之亂張魏公在秀州議舉勤王之師一夕獨坐從者皆寢忽一人持刃立燭後公知為刺客徐問曰豈非苗傳劉正彥遣汝來殺我乎曰然公曰若是則取吾首以去可也曰我亦知書寧為賊用况公忠義如此豈忍害公防閑不嚴有繼至者故來相告爾公

問欲金帛乎笑曰殺公何患無財然則留事我乎曰  
我有老母在河北未可留也問其姓名俛而不答攝  
衣躍而登屋屋瓦無聲時方月明去如飛明日公命  
取死囚斬之曰夜來獲奸細公後嘗於河北物色之  
不可得此又賢於鉏麂矣孰謂世間無奇男子乎殆  
是唐劍客之流也

慶曆中劫盜張海過鄆軍晁仲約令百姓歛金帛牛  
酒勞之海悅徑去不為暴事聞富鄭公欲誅仲約范  
文正不可富公愠曰方今患澶不舉而多方阻之何

以整衆范公曰祖宗以來未嘗輕殺臣下此盛德事  
柰何欲輕壞之他日主上手滑吾輩亦未敢自保也  
富公不以為然其後自河北還朝不許入國門未測  
朝廷意終夜徬徨不能寐思范公語繞牀歎曰范六  
大聖人也

嚴尊字君平西漢時人卜筮於成都市日閱數人每  
依卦詞教人以忠孝日得百錢足以自養則閉肆下  
簾而讀老子蜀人羅冲具車馬衣糧勸之仕君平曰  
我有餘君不足柰何以不足奉有餘冲曰吾家萬金

子無擔石之儲何謂有餘曰吾嘗宿于家見子晝夜汲汲無有足時我賣卜不下牀而錢數百塵埃厚寸無所用之豈非我有餘乎

李儋明道中知絳州還朝閣門祗候李康伯謁之因謂儋儋工文學議論稱於天下諸公欲用為知制誥但宰相以儋工未曾相識盍一往見之儋曰我若昔謁丁崖州則乾興初已為翰林學士矣今已老大焉能隨群逐隊趨炎附熱看人眉睫以冀推挽乎道之不行命也



文正公鎮越有戶曹孫君中卒子幼家貧公助之以  
俸錢百緡治巨舟差老衙校送歸作詩一絕戒其吏  
曰過關津但以吾詩示之十日相携泛巨川來時煖  
熱去淒然關津若要知名姓便是孤兒寡婦船

顏魯公為臨川內史邑有楊志堅者嗜學而貧妻厭  
之一日告離志堅以詩送之曰平生志學在琴詩頭  
上而今有二絲漁父尚知谿谷暗山妻不信出身遲  
荆釵任意撩新髮明鏡從他別畫眉今日便同行路  
客相逢即是下山時妻持詩詣州請公牒求別醮顏

公案其妻曰王歡之廩既虛豈尊黃卷朱叟之妻必去寧見錦衣污辱鄉閭敗傷風俗若無褒貶僥倖者多遂箠之後無棄其夫者

近時江南有寡婦棄其孤兒再嫁富室又生一子及其死也前夫之爭爭葬之質之縣尹縣尹判其詞曰生前再醮已無戀子之心死後歸墳難見前夫之面斷令後夫之子葬之

楊虎得罪於衛北見趙簡子曰自今以後不復樹人矣堂下之人臣所樹者過半今反危臣矣簡子曰樹

桃李者夏得休息樹蒺藜者秋得其刺今子所樹蒺藜也自今以後擇人而樹之

王沂公與一朝士有舊欲得齊州沂公曰齊州已差人乃與廬州不就曰齊州地望畢於廬州但於私便耳相公不使一物失所改易前命當亦不難公正色曰不使一物失所則彼一物必失所其人慙而退

伊川先生在經筵每當進講必宿齋豫戒潛思存誠冀以感動上意而其為說常於文義之外反復推明歸之人主一日當講顏子不改其樂章門人或疑此

章非有人君事也將何以為說及講說畢文義乃復  
言曰陋巷之士仁義在躬忘其貧賤人主崇高奉養  
備極苟不知學安能不為富貴所移且顏子王佐之  
才也而簞食所飲季氏魯國之蠹也而富於周公魯  
君用於如此非後世之監乎聞者歎服

章惇蔡下用事所以欲殺劉元城者至矣故方富廣  
東則移廣以既抵廣西復徙廣東凡甲令所載稱遠  
惡州軍無所不至雖盛夏令所在州軍監督日行一舍  
或泛海往來貶所人謂公必死然七年之間未嘗一

日病年幾八十堅悍不衰此非人力所及殆天相之  
或問何以至此曰誠而已公貶梅州忽有所厚士類  
數輩至殷勤之餘輒相向垂涕公曰豈非安世有後  
命乎客曰屬聞朝廷遣使入郡將不利於公願公自  
裁無辱公告之曰安世罪大責輕若朝廷不貸甘心  
東市之誅使國家明正典刑誅一戒百亦助時政之  
萬一何至效匹夫匹婦自經於溝瀆或不為勸使者  
入海島杖死元祐內臣陳衍蓋累聖相授不殺近臣  
悍卡屢造此禍而不克故因令使者迺往請卻以虛

聲逼諸流人使其自盡也自是廣人寢知惇卞意時  
公貶所有土豪緣進納以入仕者因持厚資入京師  
以求見惇犀珠磊落賄及僕隸久之不得見其人直  
以能殺公意達之惇乃見之不數日薦上殿自選入  
改秩除本路轉運判官其人飛馭徑驅至公貶所郡  
將遣其客來勸公治後事涕泣以言公色不動留客  
飲酒談笑自若對客取筆書數紙徐呼其僕曰聞朝  
廷賜我死即死依此行之謂客曰死不難矣客從其  
僕取紙閱之則皆經紀其家與同貶當死者之家事

甚悉客驚歎以為不可及也俄報運使距郡城三十  
餘里而止翌日當至家人聞之益號泣不食亦不能  
寐且治公身後事而公起居飲食如平常曾無少異  
至夜半伺公則酣寢鼻息如雷忽聞鍾動上下驚曰  
鍾聲何太早也黎明問之鳴鍾者乃運判公一夕嘔  
血而斃矣明日有客言者曰若人不死則公未可知  
矣然公亦無喜色於是見公處死不亂如此

慶曆三年春范文正公巡邊至為環慶經畧使知環  
州以屬羌多懷二心密與元昊通以种世衡素得屬

羗心而青澗城已完乃奏徙世衡知環州以鎮撫之  
有牛奴訛素屈強未嘗出見州官聞世衡至乃來郊  
迎世衡與約明日當至其帳慰勞部落是夕雪深三  
尺左右曰奴訛凶詐難信且道險不可行世衡曰吾  
方以信結諸胡可失期邪遂冒雪而往既至奴訛尚  
寢世衡蹴起之奴訛大驚曰吾世居此山漢官無敢  
至者公了不疑我邪帥部落羅拜皆感激心服又傳  
云世衡佯醉卧其帳中奴訛與其妻環侍不敢離左  
右既醒而謂曰我醉此爾何不殺我奴訛泣曰是何



言耶惟有一死可報吾父爾自是屬羞無不悅服

范文正公微時嘗詣靈祠求禱曰他時得相位乎不  
許復禱之曰不然願為良鑒亦不許既而歎曰夫不  
能利澤生民非大丈夫平昔之志也他日有人謂公  
曰丈夫之志於相理則當然醫之伎君何願焉乃無  
失於卑耶公曰嗟乎豈為是哉古人有云常善救人  
故無棄人常善救物故無棄物且丈夫之於學也固  
欲遇神聖之君得行其道思天下匹婦有不被其澤  
者若已推而內之溝中能及小大生民者固惟相為

然既不可得矣夫能行救人利物之心者莫如良醫  
果能為良醫也上以療君親之疾下以救貧民之厄  
中以保身養生在下而能及小大生民者捨夫良醫  
則未之有也

蘇文忠公軾與朱鄂州書云昨王殿直天麟見過言  
岳鄂間田野小人例只養二男一女過此輒殺之尤  
諱養女初生輒以冷水浸殺其父母亦不忍率常閉  
目背面以手按之木盆中初嬰良久乃死天麟每聞  
其側近有此輒馳救之量與衣服飲食全活者非一

鄂人有秦光亨者今已及第為安州司法方其在母  
也其舅陳遵夢一小兒授其衣若存所訴比兩夕輒  
見之其狀甚急遵獨念其姊有娘將產而意不樂多  
子豈其應是乎馳往省之則已在水盆中矣救之得  
免準律故殺子孫徒二年此長吏所得按舉願公明  
以告諸邑令佐使召諸保正告以法律論以禍福約  
以必行且立賞召人告官賞錢以犯人及隣保家財  
克若依律行違數人此風便革但得初生數日不殺  
後雖勸之使殺亦不肯矣自今以往緣公而得活者

豈可勝計哉

司馬溫公自以遭遇聖明言聽計從欲以身徇天下躬親庶務不舍晝夜或以諸葛孔明事多食少之語戒之公曰死生命也為之益力病革諄諄不復自覺如夢中語然皆朝廷大事也既沒其家得遺一表八紙上之皆手札論當世要務

尚書李公擇風度凝遠與人有恩意而遇事強毅不為苟合初善主荆公荆公當國冀其助而抵之乃力於他人荆公嘗遣雲諭意曰所爭者國事盡少存朋

友之義公曰大義滅親况朋友乎自中益確士論以此歸之

仁宗朝李都尉喜延士大夫盡聲色之樂一時館閣清流無不往者韓魏公於其間最年少獨未嘗造焉李數召而公數以事辭人有強之者公曰固欲往但未有名耳公處之不失和李莫能怨同時諸公亦不以爲介也

梅尚書和勝執禮嘗序送吳仲儀提點江西路刑獄云劉夔侍郎自負有道術功行一旦上章解組徑入

武夷山樓居遐想日俟仙去俄有神降之言罪莫大  
於殺人獲抱大罪奈何興妄念于帝所獲叩頭自列  
生平脩謹雖物無敢殺而況於人神曰昔提點某路  
刑獄時某縣入某死罪州如之獲弗察也其罪實繁  
變於是悵然悔咎不可及又聞陳睦嘗提點兩浙路  
刑獄會杭民有妾夏沉香者斫衣井旁其嫡子墮井  
妻訟于州必以謂沉香者擗之墮井也三易獄不合  
睦怒劾掾別委官攝治之許獄具以才薦遂逐三掾  
而殺沉香東坡詩所謂殺人無驗終身快此恨終身



恐難了盖有激云他日睦還京師久之無所授聞廟師邢頗從仙人遊乃密叩以未來事邢終拒弗之答尋語所親曰如沉香何睦為之震汗廢食者累日

孫莘老覺知福州時民有欠市易錢者繫獄甚衆適有富人出錢五百萬葺佛殿請于莘老徐曰汝輩所以施錢何也衆曰願得福耳莘老曰佛殿未甚壞又無露坐者孰若與其錢為獄囚償官遂使數百人釋枷鎖之苦其得富豈不多乎富人不得已諾之即日輸官囹圄遂空

太宗在藩王顯與周瑩為給事赤脚道者相顯曰此  
兒須為將相但無陰德耳及長太宗愛之曰溺非儒  
家柰寡學問他日富貴不免面牆取軍誠三篇令誦  
之咸平三年以使相出帥定州便宜從事忽且道士  
通刺為謁被冠褐自稱鄴都觀主樊則口角至耳亂  
鬚君剛鬣謂顯曰昨上帝牒審魂二萬至本觀未  
敢收於冥籍死於公之手者公果殺之則功冠於世  
然減公算十年二端請裁之顯謂風狂叱起後月契  
舟引數萬騎獵于威虜軍境即梁門也會雨虜弓皆



皮絃緩弱不可用顛引兵勁襲大破之梟名王貴將十  
五輩獲偽羽林印二紐漸築京觀於境上露布至闕  
朝廷以樞相詔歸赴道數程而卒

陳公泊初為開封府功曹叅軍時程琳尹開封章獻  
太后臨朝族人貴驕自杖老卒死人莫敢言公當驗  
屍即造府白琳琳望見公來迎謂曰驗屍事畢乎公  
曰未也琳遽起隱屏間曰不得相見公唯而出適苑  
所太后已遣中人至曰速視畢奏來公起再拜曰領  
聖旨未畢使者十輩督之吏等皆懼謂公應以病死

聞公怒曰何不以實吏等駭曰公固不自愛其語不  
敢公復怒曰此卒冤死待我而仲爾曹依違懼斲法  
不爾赦即自實其狀詣琳琳又迎問曰如何公曰杖  
苑琳大喜撫其背曰如此陰德官人必享前程遽索  
馬入奏已而太后族人特貢原公亦不及罪公自  
此名顯歷官臺省終三司副使人以謂積善之報未  
艾云

趙韓王為相置二大甕於坐屏後凡有人投利害文  
字皆置其中滿即焚之於通衢李文靖公曰沈居重

位實無補萬分唯中外所陳利害一切報罷之惟此少以報國爾朝廷防制纖悉備具或徇所陳請施行一事即所傷多矣陸象山云往時冗員敕局浮食是慚惟是四方奏請廷臣面對有所建置更革多下看詳其或書生貴游不諳民事輕於獻計不知一旦施行片紙之出兆姓蒙害每與同官悉意論駁朝廷清明常得寢罷編摩之事格考之勤顧何足以當大官之膳或庶幾者僅此可以償萬一耳凡此皆至論夫子曰仍舊貫何必改作古人曰和不什不變法甚言

更革建置之不可輕也或曰若是則將坐視天下之  
弊而不知救歟余曰不然革弊以存法可也因弊而  
變法不可也不守法則敝生非法之足以生弊也若  
韓范之建明於慶曆者革敝以存法也荆公之施行  
於熙寧者因敝而變法也一得一失蓋可觀矣或曰  
荆公有志於二帝三王之法度豈可厚誅乎余曰有  
志於二帝三王當自格君心始不當自變法度始有  
堯舜之君則有堯舜之治有禹湯之君則有禹湯之  
治法度云乎哉

近時有以張巡傳糊窗者有一士人見之而題四句  
於其右云坐守睢陽當豹關江淮賴此得全安至今  
青史雖零落猶障窗風一面寒

蝮蛇長十丈常吞鹿肉消盡乃繞樹出骨養創時肪  
腴甚美或以婦人衣投之則蟠而不起其膽上旬近  
頭中旬在心終旬近尾

蛇以桑柴燒之則見足出 蝮腹下有毛者殺人

盤目白腹下五一曰字卜一曰字者不可食

凡飛鳥投人家口中必有物當拔而放之

聖人不貴其獨治貴能與衆共治工垂不貴其獨巧  
貴能與衆共巧

凡人富則不羨爵祿貧則不畏刑法不羨爵祿者自  
足於已而不畏刑法者不賴其身也二者為國之所  
甚蠹而不知防之故令不行禁不止由爵祿而後富則  
爭盡力於其君矣由刑罰而後貧則人咸畏而從善  
矣

兩智不能相使兩貴不能相臨兩辨不能相屈力鈞  
勢敵也慎子云兩賤不能相事兩貴不能相使

賢者不用其所短而用愚人之所長不用其所拙而用愚人之所工困天下之智者不在智而在愚窮天下之辯者不在辯而在訥

天不能春菊冬蓮是以聖人不違時地不能洛橘汝貉是以聖人不違俗人不能手步是握是以聖人不違我所長聖人不能使魚馳獸飛是以聖人不違物所長

邯鄲有吹者托李奇人爭學之後知其非皆棄之由未始知音也有然狙召獼若鄰者以爲狗養之後聞其

但也據地吐之由未始知味也

待驟裏飛兔而駕則世莫有乘車者待毛嬙西施而妃之則終身無家矣待古之英俊而用之則國無人矣

食穀而餽田夫衣帛而笑蚕婦豈不惑哉

食水者善遊而耐寒魚食土者無心而惠蚘食虫者多力而思麋食桑者有絲而蛾蠶食肉者勇敢而悍虎食氣者神明而壽仙食穀者慧智而夭人

虎豹之軀未成文而有食牛之氣鴻鵠之鷖羽翼未



洽而有四海之心

得十良馬不如得一伯樂得十良劔不如得一歐冶  
得地千里不如得一賢人

夏不衣裘非不愛裘也煖有餘也冬不用絮非不愛  
絮也清有餘也

言不相聞故命之金鼓視不相見故命之旌旗金鼓  
旌旗者所以一人之耳目

善用兵者譬如率然率然者常山之蛇也擊其首則  
尾至擊其尾則首至擊其中則首尾俱至

孔子讀詩及小雅喟然嘆曰吾於周南見周道所以  
盛也於柏舟見匹婦執正之不可易也於淇澳見德  
可以為君子也於考槃見遯世之士所以無悶也於  
木瓜見苞苴之禮所以行也於緇衣見好賢之心至  
也於鷄鳴見古之君子不忘其敬也於伐檀見賢者  
之先事后食也於蟋蟀見陶唐儉德之大也於采芣  
見亂世之懷明君也於七月見幽風之所以造周也  
於東山見周公之先公後私也於狼跋見周公之遠  
志所以為聖也於鹿鳴見君臣之有禮也於彤弓見

有功之必報也於羔羊見善政之有應也於節南山見忠臣之憂世也於蓼莪見孝子之思養也於四月見孝子之思祭也於裳裳者華見古之賢者保其祿也於采芣見古之明王所以敬諸侯也

聽黃鍾之聲然後知擊缶之細觀袞龍之文然後知被褐之陋倦立而思遠不如遲行之必至也孤居而願知不如務學之必達也志者學之帥也才者志之役也學者不患才之不瞻患志之不立是以為之者億兆成之者無幾君子必立其志

君子無尺寸之封而民尊之無刑罰之威而民畏之  
無羽籥之樂而民樂之無爵祿之賞而民懷之其所  
以致之者一也

昔倉梧丙娶妻美而與其兄欲以為讓也則不如無  
讓焉尾生與婦人期於水邊暴水至而不去欲以為信  
也則不如無信焉葉公之黨其父攘羊而子證之欲  
以為直則不如無直焉陳仲子不食母之粟出居於  
陵欲以為廉則不如無廉焉宗魯受齊豹之謀死誣  
繫之難欲以為義則不如無義焉

周之人有愛其裘好其珍者欲為千金之裘而與狐  
謀其皮將具少牢之珍而與羊謀其羣言未卒狐相  
呼逃於重丘之下羊相呼藏於深林之中

兵之不可廢譬火馬善用之則為福不善用之則為  
禍

作法貴於易避而難犯救弊貴於省事而一令革弊  
則為腐樹弊則為蠹人弊則為病國弊則百匿並起  
所謂國弊者主德不下宜人欲不上達也

兒童之所喜者耆耄之所非耳目之所娛者乃心慮

之所疾

大明光於天下燈燭何施時雨霈于地中涓滴何潤  
晝生者類父夜生者類母陰陽之氣也

立大厦先擇匠而後簡材治國者先擇佐而後定民  
貴有常名而賤不得冒尊有常位而卑不得踰縣千  
金於市市人不敢爭分定也委一金於路兒童爭之  
者分不定也

伊尹耕于有莘孰知非夏之時人呂望釣於渭濱孰知  
非殷之漁者遇湯武文王然後能知其材也

愚者之養魚鳥也見天之寒則內魚於溫湯之中而棲鳥於火林之上水木者所以養魚鳥也養之失理必至焦爛

學士宋公濂嘗侍

上飲公素不勝杯勺舉觴即辭上強之至三觴面如赭行不成步上歡笑親御翰墨賦楚詞一章以賜仍命侍臣咸賦醉學士歌且曰俾後世知朕君臣同樂若此也

尚書魏公驥為松江教官汲汲成就人才諸生在學

居者候一更盡必携茶往視之見書聲者供茶一盃  
至三更乃携粥以隨尚有誦者供粥一碗如此者亦  
不頻數間一行之士子感激驚尚斯文性好吟咏矍  
然若不勝衣中官王振亦禮重之呼爲先生贊見惟  
怕一方振亦不較在南都法司因旱恤刑有王剛惡  
逆訴寃或以其年少欲緩之公曰此婦人之仁天道  
不時止此謂也獄遂決翌日而雨又戍卒四人牧馬  
三人互毆一人死所司拷訊一人當之公曰罪一人  
情可矜罪三人律不合上請卒得旨三人各杖一百



改戍邊

尚書軒公輓天性廉介初爲進士往淮上催糧久寒  
舟行忽落水救出衣盡濕得一綿被裹之有司急爲  
製衣一襲却之不用徐待舊衣之乾爲御史獨振冰  
蘖之聲爲浙江按察使俸給之外一毫不取四時着  
一青布袍蔬食不厭與同僚約三日以米易肉二斤  
多不能堪故舊經過者留供一飯至厚者殺一雞僚  
屬見之驚異此舉不易得也忽聞親喪次日遂行僚  
屬尚有未及知者陞副都御史總理南京糧儲清操

愈堅張都憲素侈縱設席會諸僚公獨不赴既而以  
卓食饋之亦不納

都督山公雲鎮廣西時有一老隸鄭牢者性鯁直敢  
言公進之曰世謂爲將者不記貪矧廣西素尚貨利  
我亦可貪否牢曰公初到如一新潔白袍有一沾汙  
如白袍點墨終不可前也公又曰土夷饋送苟不納  
之彼必疑且忿奈何牢曰居官黷貨則朝廷有重法  
乃不畏朝廷反畏蠻子耶公笑納之在鎮踰十年廉  
操始終不渝固不由牢而牢亦可尚云

神不歆非類民不祀非族古人繼嗣大宗無子則以族人之子續之取其一氣脉相為感通可以嗣續無間此亦至正大公之舉而聖人所不諱也後世理義不明人家以無嗣為諱不肯顯立同宗之子多是潛養異姓之兒陽若有繼而陰已絕矣蓋自春秋鄆子取莒公子為後故聖人書曰莒人滅鄆非莒人滅之以異姓主祭祀滅亡之道也秦以呂政絕晉以牛叡絕亦皆一類仲繁露載漢一事有人家祭中祀降神祭畢語人曰適所見甚怪有一官員盛服欲進而躡

踏不敢進。一鬼蓬頭，袒袒手提屠刀，剪而前歆其祭。是何神也？主人不曉其由，有長者說其舊日無嗣，乃取異姓屠家之子為嗣。即今主祭者，所以只感召得他屠家父祖而來，其繼立本家之祖先，非其氣類，自無交接感通之理。然在今世論之，立同宗又不可泛。蓋姓出於上世聖人所造，正所以別生分類。自從有賜姓、匿姓者，故立宗者又不可恃同姓為憑。須審擇近親有來歷分明者，立之則一氣所感，父母不至失祀。今世多有取他子之子為後，以姓雖異而有氣類。

相近似勝於姓同而屬疎者然晉賈充以外孫韓謐  
為後當時太常博士秦秀已議其昏亂紀度是則氣  
類雖近而姓氏實異此說亦斷不可行天子祭天地  
諸侯祭社稷及其境內之名山大川大夫祭五祀士  
祭其先古人祀典品節一定不容紊亂在諸侯不敢  
僭天子而祭天地在大夫亦不敢僭諸侯而祭社稷  
山川如季氏旅泰山便不是禮曲禮謂非所當祭而  
祭之名曰淫祀淫祀無福淫祀者不必皆是不正之  
鬼假如正當鬼神自家不應祀而祀他便淫祀如

諸侯祭天地大夫祭社稷季氏旅泰山便是淫祀了  
宋高宗問岳飛曰卿得良馬否對曰臣為有二馬日  
啗芻豆數斗飲泉一斛然非精潔即不受介而馳初  
不甚疾比行百里始奮迅自午至酉猶可二百里攬  
鞍甲而不息不汗若無事然此其受大而不苟取力  
裕而不求逞致遠之材也不幸相繼以死今所乘者  
日不過數升而秣不擇粟飲不擇泉攬轡未安踴躍  
疾驅甫百里力竭汗喘殆欲斃然此其寡取易盈好  
逞易窮騫鉞之材也高宗稱善

晏子使楚楚王令左右縛一人作盜過王問何處人也對曰齊人也王視晏子齊國善盜乎晏子曰橘生江南江北則作枳地土使然也今民生長於齊不盜入楚則盜臣不知也楚王自取弊耳

晏子使楚楚土以晏子短作小門於大門之側晏子曰往詣狗國從狗門入今來使入楚不可從狗門入也遂大門入

兔絲無根而生蛇無足而行魚無耳而聽蟬無口而鳴鶴千歲亦極其樂朝生暮死亦盡其樂

百星之明不如一月之光十牖之聞不如一戶之明  
屈軼生於庭見佞人則指必若如此舜何用今臯陶  
陳知人之術

聖人前知千歲後知萬世孔子將死遺書曰有一男  
子曰云秦王上我之牀顛倒我衣裳至沙丘而亡後  
秦王果至沙丘而亡孔子又云董仲舒亂我書後仲  
舒論春秋著傳記又云亡秦者胡後胡亥果亡秦此  
信孔子前知千歲也

草之精秀者英獸之將群者雄張良是英韓信是雄



漢未有管秋陽者與弟及伴一人避亂俱行天雨雪糧絕謂其弟曰今不食伴則三人俱死乃與弟共殺之得糧達舍後遇赦無罪此人可謂善士乎孔文舉曰管秋陽受先人遺體食伴無嫌也苟侍中難曰秋陽貪生殺生豈不罪耶文舉曰此伴非會友也若管仲啖鮑叔貢禹食王陽此則不可向所殺者猶鳥獸而能言耳今有大齧一狸狸齧一鸚鵡何足恠也昔重耳饑齊女而欲食狐偃叔敖怒楚師而欲食玉參賢哲之忿猶欲啖人而况遭窮者乎

郭林宗葬母徐孺子往吊之置生芻一束於墓前衆  
不知其故林宗曰此必南州高士徐孺子也詩不云  
乎生芻一束其人如玉吾無德以堪之愚按今人用  
束芻故實多以為美死者觀無德以堪之言又似美  
生者蓋古禮知生者吊知死者傷孺子之來吊也非  
傷也夫吊之為言唁慰之意也而美德焉意不左耶  
且吊人母死而美子德於吊意無涉林宗之解無乃  
郢書燕說類耶惜乎當日會葬諸賢無有親問之者  
陳后山扈從南郊不肯服趙挺之衣因凍而死陽節

潘氏以為却衣凍死寔陳三之細事愚竊有說焉身  
者親之遺也子全而歸之孝之終也故曰死生亦大  
矣孰謂凍死而為事之細耶夫挺之人品固可鄙而  
其衣固可却矣然當時班行故舊中獨無一綿袍可  
假之以禦寒耶易曰苦節貞凶后山之謂也

陸象山曰天下本無事庸人自擾之愚謂庸人豈能  
擾天下也哉擾天下者惟奸作聰明暨大奸大惡則  
然觀商鞅李斯之擾秦桑弘羊孔瑾之擾漢李林甫  
之擾唐王介甫之擾宋謂之庸人可乎自夫斯言之

出也世之庸人於凡天下之事有必至之憂不測之禍徃徃以此藉口誰則肯塵犯人憂天之念哉

秦始皇坑儒說者謂設為陷阱而殺之愚以為坑者只是掩其不知而加害也非真掘土而為坑也今民間訟牒亦有坑陷之詞即是此意此坑字當作虛活字看如古云聲色溺人非真溺於水也旦晝之梏非梏以刑也不然白起坑降卒四十萬於長平項羽坑降卒二十萬於新安設使掘土為坑若是其廣大彼降卒寧未知之又寧肯帖然束手而就死乎

莊定山賦曾節婦詩曰二十夫君棄妾身諸郎痴小  
舅姑貧自傷薄命同衰葉不掃蛾眉嫁別人化石未  
成猶有淚舞鸞雖在不驚塵鎖窗獨對東風樹歲歲  
花開他自春羅一峯謂此詩苦心苦語可泣鬼神  
或問朱買臣養去婦於官舍陸放翁會出妻於沈園  
而皆及其後夫焉於義禮何居愚曰買臣之妻自厭  
糟糠而去放翁之妻得罪姑氏而離與廟絕矣况二  
婦無良再醮稿砧揆之義禮二子養之會之不亦過  
乎夫養之會之且不可而又及其後夫焉男女之防

不亦瀆乎或曰放翁不能忘其結髮之情四十年間  
而會於沈園者三焉其視買臣忿妻厭貧求去而驕  
之以富貴養之以終身者不有間乎愚曰不然妻之  
出也毋之憾也忘毋之憾而溺妻之愛可乎彼既別  
有所天此猶不能割愛不已惑乎律二子之失猶魯  
衛之政也皆不可以為訓

胡東洲為督學時有士子某者不帥教懲以夏楚明  
年其人狀元及第官翰林苑東洲以述職至京師其人  
設席款之以新得古晉窰盤盞行酒且曰此器世所

寶也但俗眼不識之耳其意蓋譏東洲往時不知已也東洲曰以老夫觀之此器脆薄容易破綻終不若良金美玉之器為可寶也其人深悔失言

朱文公有足疾嘗有道人為施針熨之術旋覺輕安公大喜厚謝之且贈以詩云幾載相扶藉瘦筇一針遠覺有奇功出門放杖兒童笑不是從前勃率翁道人得詩徑去未數日足疾大作甚於未針時亟令人尋逐道人已莫知其所往矣公歎息曰其非欲罪之但欲追索其詩恐其持此誤他人耳

綠雪亭中有二石缸日久水濁或曰放田螺數升食其淤泥可也或曰以黑鉛一片置水中水即清澈缸中養鯉魚數十頭每陰霧雷雨即跳躍出外或曰以龜鱉一二枚守之即不跳躍予試之皆驗

蘇東坡頻年謫居嘗作詩曰人家養子愛聰明我為聰明誤一生但願生兒愚且蠢無災無害到公卿近時楊宗伯月湖反其意作詩曰東坡但願生兒蠢只為聰明自占多愧我平生愚且蠢生兒何怕過東坡愚按詩二詞指雖若不同其由激而不由衷將無同



乎孟子曰其子之賢不肖皆天也杜子美曰有子賢與愚何必掛懷抱觀孟子與少陵之言其於天命委蛇消息盈虧之理可謂達哉

南宋王懿與兄叡同起義兵與慕容韋戰敗懿被重創走與家屬相失路徑大澤不能前困憊臥於林中忽有一小兒青衣年可七八歲騎牛行見懿驚問曰漢已食未懿言飢小兒去須臾復來得飯與之懿食畢欲行會暮兩江溢莫知津徑遇有一白狼至前仰天而號號訖啣懿衣因渡水懿隨之得濟與兄叡相

及後宋武帝受命以懿為徐州刺史懿於彭城立佛  
寺作白狼童子像於塔中以存河北所遇也

元末時蕭縣一男子樵于白茅山時林木蒼蔚寂無  
人行獨一犬隨之樵者為虎所獲將噬之犬鳴闐不  
已力竭而死虎亦遁去樵者遂免害父老相傳以為  
義犬噫世之忘義者有愧於此犬多矣錄之豈獨為  
一犬哉

日本國。即古之倭奴其地周回數千里西北至海  
東北限以大山國王以王為姓歷代不易文武皆世

官有五圻七道附庸國凡百餘其俗黥面文身披髮  
跣足婦女不淫不妬飲食用籩豆初喪却酒肉計其  
道里在會稽之正東洪武四年朝貢至今不絕

琉球國○有大琉球小琉球在泉州之東大海中主  
姓歡斯所居多聚髑髏殿宇皆刻禽獸其人去髑髏  
手羽冠毛衣無禮節父子同牀而寢婦人產子必食  
子衣好剽掠殺人祭鬼不知節候國西有澎湖島海  
水漸低謂之落埭舟行誤入者百無一回洪武四年  
朝貢其國王嗣立皆受

本朝冊封國有壽安鎮國山永樂初

御製碑文賜之

朝鮮國○箕子所封之國東西濱海北鄰女直西北  
至鴨綠江廣二千里袤四千里在山東之東北俗無  
淫盜讀書喜文字飲食用俎豆官吏閑威儀柔仁惡  
殺崇釋信鬼男女群戲相悅為婚死經三年而葬洪  
武二年其國王顯表賀 即位 賜金印誥命封高  
麗國王其後侍郎李成桂代位請改國號 詔仍朝  
鮮至今朝貢

占城國○即古越裳氏其地東西七百餘里南北三十餘里東北至廣東舟行可半月國有縣鎮護以輓城王出入乘象頭戴金帽身被瓔珞每坐朝有美女三十人侍從官屬謁見皆膜拜其人好潔日三五浴以腦麝塗體以諸香薰衣性兇悍果於戰鬪商舶至即差官監盤十取其二外聽交易產大珠如水晶大於鷄卵前代屢服屢叛洪武初遣使朝貢

詔封為王每國王嗣位必請

命遣使冊封以為常

真臘國○即占城之南自泉州海行月餘日可到其地約七千餘里王視朝坐五香七寶牀上施寶帳頭帶金寶花冠被珍珠璣珞耳懸金鐺國城周七十餘里殿宇三十餘所頗壯麗以象牙為壁文木為竿跨以金橋長三十餘丈有銅臺上列銅象二十四隻各重四千斤戰象幾二十萬馬多而小奉佛謹嚴日用舞女三十人舞獻佛飯民間亦尚華侈以錦圖身諺云富貴真臘是也洪武初表獻方物至今不絕

于闐國○在亦力把力國南東至京師一萬餘里

其王錦帽金冠不令人見髮見髮即歲儉地方千里  
山多美玉有好馬駝騾寺塔僧尼甚衆每設齋日王  
必親自洒掃饋食俗無禮義多淫盜喜歌舞上紡織  
初無蠶求婚於鄰國女懷蠶以歸關守不敢驗女刻  
石戒勿殺蚕蛾出盡始治繭宋開寶中獻美玉一塊  
重二百三十七斤又產獨峯駝獅子名馬有崑崙山  
黃河之源出于此永樂六年始通朝貢

撒馬兒罕國○疑即古之罽賓國東西三千餘里東  
至京師一萬五千餘里有大頭痛小頭痛之山赤

土身熟之阪騎步相持繩索相引危險特甚其王戴  
牛頭冠坐金馬座葱嶺有淫祠以金為屋以銀為地  
祠前有一魚脊骨其孔中通馬騎出入人多工巧善  
治宮室器用金銀以手取食有鐵門關產寶物千種  
琉璫光瑩勝玉唐開元中遣使貢秘文奇藥

本朝洪武二十年来朝至今不絕

交趾國○古南交之地至 京師一萬二千餘里洪  
武初其主陳日烜率先歸附 賜安南國王印傳至  
日烜其臣黎季犛立永樂四年討平 之求立陳



氏後無所得因郡縣其地立三司以鎮之洪熙元年  
寇黎利復反又討之始奉表乞立陳暲為王詔封  
暲為王後利篡暲而自立朝臣復請加兵會利遣  
使謝罪請命因而與之天順初國王黎濬被黎淙  
所弑其陪臣黎識等表請于

朝遣翰林錢學士溥特節封黎灝為王其地夷獠雜  
居不知禮義椎髻剪髮跣足文身好浴善水席地盤  
足人有頭能飛者以兩耳為翼夜則飛去海邊食魚  
鰕曉復歸身然不常有也土產猩猩人面猿身諸言

嗜酒有波羅大如冬瓜其香可啖人有阮翁仲者身  
長三尺始皇使將兵威震匈奴及卒遂鑄其像立司馬  
門今人墳墓間有石人曰翁仲者此也

大秦國一名犁軒在西海之西地有弱水流沙幾  
於日入之處地方數千里有四百餘城小國役使者  
數十約至京師四萬餘里其王以織金纏頭屋宇  
以水晶為柱琉璃為瓦其人長大美甚有官曹簿領  
皆髡頭而衣文綉王少出惟誦經禮物出則乘馬馬  
皆飾以金玉珠寶或災異及風雨不時輒廢而更立

賢者廢者無怨有幻人峭鼻拳髯長四天餘能額上  
為炎燼手中作江湖舉足而珠玉自墮開口則幡旌  
亂出海中有鬼市王客和同我往彼去彼來我歸以  
直置諸物旁待領直然後收物有珊瑚洲土人以鐵  
銅取之

大食國○本波斯之別種在夏州之西北地方千里  
勝兵四十萬民俗侈麗天寒多雪其王頭纏織金番  
布勒望則戴純金寶冠所居以瑪瑙為柱以綠土為  
壁以水晶為瓦帷幕皆百花錦臺榻飾以金玉堦砌

包以紕金玉每視朝坐珍珠簾內有丞相披金甲戴  
堦墀擁衛左右餘官各領兵馬馬高七尺士卒驍勇  
武藝絕倫衙濶六七丈鋪以石板極精緻民居與中  
國同但瓦則以薄石為之市肆喧譁百貨萃聚有駭  
馬云與龍交所產者日行千里有駝鳥勝得人騎瓜  
大者數人食一枚其王常令人入海經涉八年未極  
西岸於海中石上見大樹皆生小兒見人笑而不語  
連枝摘取即乾黑其國在唐宋時皆通朝貢

西洋吉里國○其國乃西洋諸番之會海濱為市行

者讓路道不拾遺俗稍近古產駿馬永樂以來朝貢不絕

一弗敵國○在吐谷渾北有屈海周千餘里衆有萬戶不食五穀惟食魚與蘇子頽弱不諳戰鬪忽見異人舉國便走性如野獸體輕工走逐不可及是蠻夷中之醜類也

勿斯里國○有一十六州周回有六千餘里有二百六十村每村供國用一日可足一年之食其王白哲纏頭着番衫出入乘馬前有看馬三百疋皆金鞍寶

轡有虎十頭縻以鐵索伏虎者百人弄鐵索者五十人持擗捧者一百人臂鷹者三十人又千騎圍護有親奴三百各帶甲持劔鳴鼓者百人儀從其都有大塔高一百丈他國或兵侵則舉國據塔以拒敵上下可容二萬人內居守而外出戰

三佛齊國○本南蠻別種與占城為鄰在泉州之正南管十五州國人多姓蒲王出入乘船身纏花布衛以金鏢民居蓋以柳葉習水陸戰男女椎髻好潔天氣多熱少寒俗稱其王為龍精不火食食則大荒不

水浴浴則大潦惟食沙糊浴蓄薇露而已有百寶冠  
甚重每大朝會惟王能戴之傳禪則集諸子能勝之  
者嗣位自洪武以來朝貢不絕

沙華公國○在大海中其人肆行劫掠商舶或漂至  
其國則擒人燒食之又有一種曰毗舍耶者與泉州  
之晉江縣相近其人語言不通裸袒野睢殆畜類也  
或時至晉江劫掠其來不測多羅生畜獸之意喜鐵  
器及匙筯人閉戶則免但刳其門闥而去櫬以是筯  
俟俯拾可綴數步又東南有女人國水常東流蓮肉

長尺餘核挑長二尺其國無男子其女感風而生女  
女貴多有侍男男子不得有侍女生女從母姓

兀良哈國○即古之山戎無屋宇行則車為室止則  
氊為廬自君長以下皆食畜肉衣毛皮貴壯賤老怒  
則殺父兄娶先掠女歌舞送葬無禮頭髻髮中最甚  
洪武二十二年 命其酋長為指揮使各領所部朝貢  
至今不絕

默德那國○即回回祖國有城池宮室民物蕃庶非  
自殺不食忌豕肉齋戒拜 天製造雕鏤尤極工巧



宣德中來朝貢方物

木蘭皮國○在西海中自大食國發舟正西海百餘日方至其國一舟可容萬人舟中有質食肆機杼之屬言舟之大者莫如此國所產極異麥粒長三寸底圍六尺榴重五斤桃重二斤杏櫟重二十餘斤胡羊高數尺尾大如扇春剖腹取脂數十斤縫合仍活不取牋死日晷長三時秋風忽起人獸凍就水飲稍遲則涸死

本稿沙國○城方一千餘里王著戟衫金帶金冠婦

入着珍珠衫工產金寶極多民居七層每一層為一家其國先明乃太陽沒入之地至晚日入其聲如雷每於城上用千人鳴金吹角以混日聲不然則孕婦小兒皆驚死斯言恐未足信

勿拔國○邊海有陸道可到大食王人露頂跣足纏布帷宰相及王之左右乃着衫纏頭王居用磚民居蓋以茅人多妖術能變身作禽獸水族形善咒詛人死將葬則親戚皆舞劍而入問以死故若人殺死我等當為報讐喪主答以非人所殺自係天命乃拔劍

而哭有大魚長十餘丈筋骨可架屋骨節可舂米有  
山圍四千餘里大中無人烟出血竭玳瑁龍涎等物  
三苗國○在荊陽之間唐虞時恃險為亂今岳州是  
也昔高辛時有大名盤瓠人有父為賊所殺者誓于  
衆曰能為我復讐者以女妻之盤瓠聞之掉尾而去  
遂啣賊首而還因妻以女入山三年生六子六子既  
長問於母曰吾父是誰母指犬曰此是父也六子耻  
之遂殺盤瓠今貴州夷人父老則賣之名賣翁苗又  
有東苗西苗紫苗苗紅佬佬花佬佬又五溪之蠻曰

猶曰徭曰僮曰仡曰伶曰仡佬字皆從犬盡盤瓠種也

三嶼國○散居南海中每一聚落約一千餘家地多崇崗疊嶂憑高依險編茅為屋其人形短而小眼圓而黃虬髮露藍巢于木巔或三五為群跼伏草莽以暗箭射人授以瓷碗則俯拾跳呼而去

百濮國○在雲南之西南即麓川平緬種類不一自漢以來叛服不常各有土酋為主洪武中猶負固不服命黔寧王討平之不加約束聽其自為聲教上

下僭奢雖微名薄職皆繫金銀寶帶官民皆以笏蔽  
為帽飾以金玉珍寶為高頂如寶塔狀徧插翠花羽  
毛後垂紅纓以坐象為貴其相見則合掌拜跪而無  
端肅拱揖之禮長於已者則跪之見頭目則膝行以  
前三步一拜地無城池因高山為砦軍民無定籍聚  
則為軍散則為民師行無紀律倚象為聲勢每戰則  
自縛於象上悍而無謀房屋很陋覆以草或為竹樓  
如兒戲狀不重處女未笄聽與弱冠男子通而相得  
者為夫婦凡子弟有職名則父兄拜跪之坐受自若

父母死則多聚年少歌舞飲酒謂之娛苑不知節序  
惟望月之出沒以測時候正統初麓川又反

命靖遠伯王公驥征之始平

元城先生在宋杜門屏迹不妄交遊人罕見其面然  
田父野老市井細民以謂若過南京不見劉侍制如  
過泗州不見大聖及沒耆老士庶婦人女子耕薰廟  
誦經而哭父老日數千人至墳擁不得其門而入家  
人因設數大爐於廳下爭以香炷之香價踊貴後二  
年虜人驅墳戶發棺見公顏貌如生咸驚曰必異人

也問誰墳并對以某官一無所動蓋棺而去

寧王常獵于鄆縣界搜林忽見草中一櫃扁鎖甚固王命發視之乃一少女也問其所自女言姓莫氏伯叔庄居昨夜遇火光賊賊中二人是僧因劫集至此動婉含嚔冶態橫生王驚悅之乃載以後乘時榮者方生獲一熊置櫃中如舊鎖之時上方求極色王以莫氏衣冠子女即日表上之具其所由上令充才人經三日京兆奏鄆縣食店有僧二人以錢一萬獨賃店一日一夜言任法事唯昇一櫃入店中夜久腦膊

有聲店戶人怪日出不啟門撤戶視之有熊衝人走出二僧已死骸骨悉露上知之大笑書報寧主寧哥大能處置此僧也莫才人能為秦聲當時號莫才人轉焉

徐敬業年十餘歲好彈射英公每曰此兒相不善將赤吾族射必溢鎗走馬若滅老驥不能及英公常獵命敬業入林趨獸因乘風縱火意欲殺之敬業知無所避遂屠馬腹伏其中火過浴血而立英公大奇之近有盜發蜀先王墓墓穴盜數人齎見兩人張燈尉



其侍衛十餘盜驚懼拜謝一人顧曰爾飲乎乃各飲  
以一杯兼乞與王腰帶數條命速出盜至徐口已漆  
矣帶乃巨蛇也視其穴已如舊矣

大足初有士人隨新羅使風吹至一處人皆長鬚語  
與唐言通號長鬚國人物茂盛棟宇衣冠稍異中國  
地曰扶桑洲其署官品有王長戢波日役島邏等號  
士人歷謁數處其國皆敬之忽一日有車馬數十言  
大王召客行兩日方至一大城甲士守門焉使者道  
士人入伏謂殿宇高敞儀衛如王者見士人拜伏小

走乃士人為司風長兼駙馬其主甚美有鬚數士琅  
士人威勢桓赫富有珠玉然每歸見其妻則不悅其  
王多月滿夜則大會後遇會士人見姬嬪悉有鬚因  
賦詩曰花無蕊不妍女無鬚亦醜夫人試遣物心無  
未必不如物心有王大笑曰駙馬竟未能忘情於小  
女順頷問乎經十年餘士人有一兒二女忽一日其  
君臣憂感士人恠問之王泣曰吾國有難禍在旦夕  
非駙馬不能救士人驚曰苟難可弭性命不敢辭也  
王乃令具舟令兩使隨士謂曰煩駙馬一謁海龍王

但言東海第三汊第十島長鬚國有難求救我國絕  
微須再三言之因涕泣執手而別士人登舟睥睨岸  
岸沙悉七寶人皆衣冠長大士人乃前求謁龍王龍  
宮狀如佛寺所圖人宮光明迭激目不能視龍王降  
階迎士人齊級升殿訪其來意士人具說龍王即令  
速勘良久一人自外白曰境內並無此國其人復哀  
祈言長鬚國在東海第三汊第七島龍王復叱使者  
細尋勘速報經食頃使者返曰此島鰕合供大王此  
月食料前日已追到龍王笑曰客固為鰕所魅耳吾

雖為王所食皆稟天符不得妄食今為客減食乃令  
引客視之見鐵鑊數十如屋滿中鰕有五六頭色赤  
大如臂見客跳躍似求救狀引者曰此鰕王也士人  
不覺悲泣龍王命放鰕王一鑊令二使送客歸中國  
一夕至登舟回顧二使乃巨龍也

郭代公嘗山居中夜有人面如盤眼日出於燈下公  
了無懼色徐染翰題其頰曰夕成人偏老長征焉不  
肥公之驚句也題畢吟之其物遂滅數日公隨樵閑  
步見巨木上有白耳大如數斗所題句在焉

有史秀才者元和曾與道流遊華山時暑環憩一小  
溪忽有一葉大如掌紅潤可愛隨流而下人獨接得  
寘懷中坐食覺懷中漸重潛起觀之葉上鱗起栗栗  
而動史驚懼弃林中遽白衆人此必龍也可速去也  
須臾林中白煙生彌於一谷中下山未半風雷大至  
若有借人入房將睡暗中誤踏破一生茄心疑為蟾  
蜍之屬臥中甚悔其枉害物命到中宵忽有扣門覓  
命者僧約明日為薦按及天明見之乃茄也此只是  
目家心疑便感召得遊魂滯魄附會而來又如遺書

載一官員於金山寺薦拔亡妻之溺水者忽婢妾作  
亡魂扶語言死之甚冤數日後有漁者救得妻送  
還之此類甚多皆是妖由人興人無覺焉妖不自  
作

昔武三思置一妾絕色士大夫皆訪觀狄梁公亦往  
焉迺遁不見武三思搜之在壁隙中語曰我花木之  
妖天遣我奉君笑談梁公時之正人不可以見蓋端  
人正士有精爽清明鬼神魑魅自不敢近所謂德重  
鬼神欽鬼神之所以能近人者皆由人之精神自不

足故下

唐楊收少年廬山修業時遇一道者謂曰子若學道  
即有仙分若必仕宦位至公相然終焉有禍能從我  
學道乎收心在進取謝絕之及登廊廟竟罹南荒之  
殛宋夏竦父為侍禁時竦尚幼有道士愛之乞為養  
子父止竦一子弗許道士曰是兒有仙骨不爾位極  
人臣但可惜墮落了後竦為通判又見昔道士曰尚  
可作地仙在城都復見道士跨驢於市搖手曰無及  
矣遂不復見考竦行事墮落固所不免然則楊與夏

雖有異人之遇亦何救其平生哉

愚讀劉晨阮肇天台遇仙女之事心竊疑焉夫二女  
既仙必能離欲豈肯不有其躬而與塵寰夾藥之夫  
自為伉儷哉或者山精狐魅幻化以迷之耳其曰劉  
阮還家子孫無有存者此乃述齊諧之業者附會之  
過也何足信哉近年有朝士奉使關西過臨潼浴驪  
山溫泉和後玉環不覺心動浴罷還行臺盤坐追涼  
忽見絳紗燈熒熒導一女官持節而來告之曰貴妃  
且至俄頃霓旌宮扇擁貴妃至中庭鳳冠翟裙環珮



珊珊雪膚花貌姿媚流麗與朝士交禮畢歎語移時  
遂携手入室薦枕席之歡五鼓既作女官又領仙仗  
迎之而去自是隨其所止源源而來朝士以為奇遇  
驪山父老聞之曰是此山老狐精也其文官輩小狐  
精也即此觀之劉阮之所遇非此類也乎

刻畫永編跋

我

憲臺承山宋翁節鎮天雄保釐河朔每事範今  
師古確有章程凡我屬吏仰承明憲時聆警  
欵退而人人悅服乃知

翁文事武備醞籍有自非徒事一偏而弗睹  
其全者可倫也一日晉謁臺下手出是編選  
得而受讀焉則見夫嘉言善行隱德遺事種

種具陳均之足以備觀省而昭鑑戒玩誦良久恍然有得始嘆翁之學術正大光明宜其發於事業章章赫奕足以爲人師表如此謹用捐俸入梓布之諸屬以廣嘉惠抑者耀德崇化禁於未發亦翁之防範人心一端云  
嘉靖甲子歲孟冬之吉

大名府知清豐縣事濩澤閻承光刊